

人物傳第三目錄

吳引孫

周實純

阮恩霖

桂邦傑

陳重慶

陳洵慶

劉富曾

劉顯曾

于長慶

目錄

人物傳第三

江都縣新志卷八

吳引孫字福茨先世安徽歙縣人自高祖遷揚州居郡城而籍儀徵父植候選直隸州州判以引孫貴贈光祿大夫母周封一品太夫人植能文章充道光己酉選貢平生精易理旁通諸子百家之書遭逢世亂甫中年倖際以歿遺孤三引孫次居仲年十三其季筠孫才三歲耳植時寓居寶應身後貧若洒舉家流離異鄉久之始得歸里周太夫人教子有禮法其後引孫與弟筠孫並貴顯而太夫人亦受崇封故老每述其當年事以爲榮焉引孫年十七補諸生旋食廩餼同治癸酉充選貢廷

卷八

人物傳

一

試一等以七品小京官用籤分刑部舉光緒己卯順天鄉試供職軍機處以資升領班章京戊子秋由員外郎外簡浙江甯紹台道兼監督浙海關故事江海關要缺皆先奉特旨記名別爲一單引孫用尋常京察記名簡放以在樞廷久受知深異數也下車之初卽創立崇實書院課諸生有用之學而以文藝居其次所造就甚眾甬俗佞神非時迎賽往往舉國若狂引孫嚴禁風頓革天主堂教士趙保祿庇教民干涉詞訟勢張甚引孫一折以理趙無如何亦遂詘服訖引孫之去民教相安無齟齬甯紹台道負分巡海疆之責兼領鎮海南北兩礮

臺甲午中日之役引孫規畫防務於濱海要隘密布椿木礮臺以外築壘護之購軍械增練新兵並用保甲法清戶口嚴訶察以防宵小之潛與敵閒之入外內井井地方恃以無恐憂勞爲多在任十年升授廣東按察使粵俗強悍喜械鬥細故之爭時釀爲巨案引孫以其風不可遽革乃用里語製爲勸息鬥歌刊布全省以曉愚民期其感化省垣初設巡警章制未備引孫爲更訂之復創立武備學堂時合肥李文忠總督兩廣睹引孫所爲深器之遷甘肅新疆布政使新疆邊遠吏治窳敗前布政使升署巡撫潘效蘇侵蝕庫款至數十萬引孫發

其覆於陝甘總督升允升允遂據以入奏潘得罪遣戍以兩司揭參督撫康雍乾三朝時有之嘉道而降百餘年所僅見也朝命引孫卽署潘遺缺越三年以母老乞開缺歸省時周太夫人就養筠孫任所年八十餘矣逾年復以母命促入都簡授安徽布政使以回避元籍調任湖南戊申春丁母憂憂闋復簡授浙江布政使辛亥秋武漢變作遂棄官歸自此遯跡海上黃冠野服爲遺民年七十卒卒後歸葬先人墓次子二人粹賢頌賢粹賢爲兄慶孫後

周實純字頌孝祖鑽父光旂兩世學行並見前志實純

幼聰慧五歲誦毛詩有戲以自西徂東屬對者卽應曰
俾晝作夜九歲能詩嘗有句云路熟犬迎客水清魚瞰
人長老驚異之未冠補諸生久之始食廩餼屢應布政
司試未售晚乃援例貢太學以訓導注選非其志也當
咸豐閒東南之亂士夫避地者多於泰州以東濱海之
鄉文物稱盛實純時亦流寓年甚少與諸名士游觴詠
之會迭相倡和往往傾其坐人歸里後所交友若朱葵
生鳳儀趙幼松德璽輩皆當時名能文者咸推服實純
白首場屋屈於有司人或爲之悼惜而實純自少至老
天懷澹定未嘗自矜其才亦未聞嗟歎其不遇也少藉

先業資用頗饒性慷慨嘗割產以濟親友之急久之遂
爲貧士凡居鄉教授者二十年客游者又二十年年七
十乃不復出平生和易與人言輒啍啍雖或侮之不以
爲意未嘗以惡聲加人衣履整潔飲食約而精中歲居
貧不改其故歸自山左有子能養日肩輿出飲茗與諸
少年襍坐或凭几旁看弈棊貌豐腴而色溫霽美須髯
望之疑爲神仙中人幼從同縣陳孝廉景富讀終身嚴
事之孝廉五十餘生子懋森少實純三十歲實純視爲
弱弟相親愛年逾八十距孝廉之歿已久每與人述兒
時事言及師門輒爲愴然人謂實純散古誼求之晚近

不多觀也以丙寅十二月卒年八十有六有詩詞藁若干卷尙待梓子四人其季榮年蚤卒桂年樹年柏年並能世其家

阮恩霖字霞青世居北湖公道橋而籍儀徵太傅文達公元羣從孫也初生之年文達尙在親爲命名恩霖年十六補諸生同治戊辰謁喬勤恪松年於泰州勤恪故無子女配李夫人夫人之兄有女孫依勤恪署中勤恪愛恩霖才因妻焉爲掌書記禮以上賓隨勤恪官皖官豫前後十餘年勤恪卒於官子身無親丁唯恩霖侍左右湯藥之奉及飾終一切皆一身任之以故義聲滿大

卷八

人物傳

四

梁恩霖感勤恪國士之知旣失勤恪乃悵然南歸繪繁臺感舊圖徧徵題詠志不忘也恩霖少負文名屢應布政司試未售乃援例入監應試順天得挑取謄錄分國史館期滿議敘鹽大使棄不就屏居北湖者累年六十後移家入城中間歸湖者再而終卒於城平生喜爲詩晚年與陳甦交重慶許久庵星箕諸先生游時爲觴詠之會白首金盡而豪情如故不惜典裘以供一醉歲乙丑以入學滿六十年循先朝故例爲重游泮水之舉是日與會者六人恩霖外江都則凌鴻壽陳煜儀徵居郡城者則劉富曾王鑿張承澤時覺宮蕪廢已久諸老人

須髮皓然鼓樂綵旗迎導以入於瓦礫中行釋菜禮兒童鼓掌父老或感歎泣下滄桑而後所僅見也以丁卯十月卒年七十有九有詩集若干卷尙待梓

桂邦傑字蔚丞父達生太學生績學蚤世邦傑生三歲而孤時東南亂未定期功之親各奔竄無相顧者母陳挈之依外家寄居泰州亂平歸里邦傑時年十一熒熒母子無一椽之茆乃賃居尼庵中母故通經史日令邦傑出就外傅暮歸篝鐙自課書不熟輒不許就寢夜深人靜誦聲琅琅聞者往往感歎泣下年十四補諸生又三年而食廩餼督學彭侍郎久餘親書扇以贈勗勉甚

至而邦傑應布政司試者十光緒己丑始舉於鄉五應禮部試復不售年逾五十乃以丁未會考得官知縣籤分河南先是兩淮使者程儀洛創設儀董學堂延邦傑教授地理丁未春應會考入都德化劉侍郎廷琛方監督京師大學耳其名聘爲教習及邦傑當應官河南侍郎惜其去奏請留以勞晉直隸州知州復將改授京秩而武漢變作邦傑滯留京師前後居大學者十年歲丁巳江都擬續修縣志主其事者寓書京師邀爲總纂明年遂歸前志修於光緒初歷四十年中更滄桑之變官書零落故老陵替司采輯者又罕識體要詳略失宜或

雜以東西名詞時邦傑已老與興化郭鍾琦同事鉛槧除煩濫補闕漏七閱寒暑始克蒞事志局既徹晚計益窘鬻文授徒僅可自活逮丁卯春南中兵起邦傑年逾七十再經世變飄飄老儒無地可置憔悴憂傷遂於是年歲除得疾因不起邦傑幼孤露母撫以成立故雖老恒視若孩提邦傑亦自忘之歸自京師母年近九十邦傑亦六十許矣垂白髮率孫曾問安視膳依依下母考終邦傑於禮不毀乃頓首長號哀慟幾絕弔者至不忍聞人謂母苦節邦傑純孝有是母宜有是子也平生嚴以律已而責人則寬重言諾爲人謀必甚忠性素慷慨其居京師於鄉人之貧者疾病者死而無棺者輒解囊助之不少吝而受人絲粟之惠則必謀所報報必以豐以故積數十年無餘財以戊辰五月卒年七十有三著有詩文集若干卷尙待梓

卷八

人物傳

六

陳重慶字聾卿一字默齋晚號甦安先世由福建遷揚州居郡城而籍儀徵祖嘉樹江西布政使父彝內閣學士兼禮部侍郎銜諡文恪兩世俱載前志重慶幼穎異四歲能屬對知音聲咸豐癸丑舉家避兵寶應文恪於顛沛中親課之讀未冠補諸生有文章名隨文恪居京師舉光緒乙亥順天鄉試入資爲內閣中書時重慶三

黨之親多官京朝先後或典試或爲同考凡九值禮部試七以功令回避未入場以故未登甲科士論惜之遂外改同知捐升道員籤分山東時巡撫張勤果矐勤吏治號綜窳名實而吳縣潘文勤祖蔭居京師以愛才名文勤寓書勤果稱重慶倜儻間敏勤果因委以督辦下游河防兼轄精健等十營充辛卯武闈監試重慶昔隨文恪官東河諳悉工程及督辦下游河防豫於三月中修利津海口埽壩二十七或譏其無用及秋盛漲竟賴其力又濟陽城外石壩監修者前督辦所委不遵補填之法重慶不爲畫稿其後壩果決死者七千餘人人始

服其先見以姻親回避改官湖北湖廣總督張文襄之洞委以總辦牙釐重慶承釐務大壞之後爲訂新章除陋規剔中飽委員徵逾比者獎以差不及者罰亦如之司事扞手則厚其餼而峻其防勤事者賞舞弊者懲法旣行其年增收銀五六十萬兩官裕而商不病由是文襄奏以重慶署鹽法武昌道仍兼總辦牙釐復合巡撫密薦其可大用庚子春奉文恪諱歸後陝甘大府以重慶前在湖北協餉有勞奏請加頭品頂戴方重慶之歸也未幾義和團事起時雖居倚廬上書諸大臣論國事前後以數十計語及誤國諸人輒憤慨不自勝明年和

議成重慶知時事之不可爲憂閱年未六十遂不復出
辛亥而後息影杜門益罕與世接唯時以匪風下泉之
思寄之篇什昔爲文喜瑰麗於詩亦然至此體格一變
悲涼慷慨多變徵之音重慶亦不自知也重慶少喜談
兵便弓馬隨文恪官隴官院盡交諸將之豪傑者庚子
之亂東南岌岌動搖時徐上將寶山居草澤中眾十數
萬人重慶以其人驍勇宜撫而用乃爲騰書當道保以
百口徐旣授官來謁重慶與之浮大白命兩子與序兄
弟及辛亥之變揚州賴徐一人以完然後知重慶有知
人之明且爲人所不敢爲其膽與識俱不可及也少工

書師唐人五十後由唐追晉人書俱老畫山水取法宋
元兼精篆刻唯不輕作好讀書自少至老手未嘗釋卷
平生不設城府與人交一以坦白喜怒皆真無僞飾者
以戊辰十月卒年八十有三著有默齋詩稿十六卷子
二人延會延韓並稱賢孝而延韓尤能文章

洵慶字虞文文恪季子也蚤慧八九歲時文恪官京師
嘗攜游某寺寺有開成石井闌洵慶一見遽曰唐文宗
年號也時南皮張文襄在坐驚曰孺子乃知之耶未冠
補諸生旋以高等食廩餼洵慶於經治三禮於文師桐
城於學主有宋五子而兼及二氏皆文恪家法其事親

以親之憂樂爲憂樂與兄重慶皆生年值午而相差一紀重慶豁達洵慶則縝密與宋二蘇頗相類而相愛亦如之顧豐於才而嗇於遇光緒辛卯以官生應順天鄉試是科主試凡四人而江南官生額中二名洵慶卷已擬中適主試者於次居第三因見擯額外丁酉又以病未入場遂不復應舉乃入資爲儒官選授震澤訓導值歲試豫爲文戒敕考童卒事無爭鬪者入學新生謁見例有贄而儒官清貧往往爭厚薄洵慶以爲可鄙凡新生來謁者弗與較縣有二生挾天主教勢橫鄉里洵慶詳禡其衣衿士風爲變明年乞調丹徒丹徒貧瘠人所

棄時文恪予告歸里以地邇便省覲也洵慶憫貧兒失學者多擬廣設義塾請於郡守以漲灘數千畝種蘆收課爲經費會郡守去不果乃與縣人楊吏部鴻發創設義塾三其資則分籌其半適歲試有富家子入學教諭某索其贄甚巨洵慶不欲立異乃以已所得歸之義塾人服其清庚子丁文恪憂歸越十二年辛亥復選授寶山訓導未赴而武漢事起自此卻埽杜門日誦金剛經或爲詩以自遣洵慶隨文恪歷官京外諳悉吏治方文恪尹順天時適畿輔水災自秋徂春籌辦振撫洵慶左右文恪並設方計款集而事以舉被災之民全活甚眾

婦翁丁文誠寶楨爲時名臣極器洵慶稱其有監司之才而卒不獲一第屈於儒官遭逢國變隱遯沒世士論惜之先重慶四年以甲子二月卒年六十有七子二人長延豐孝謹有文前卒次延暉

劉富曾字謙甫世居郡城籍儀徵祖文淇候選訓導父毓崧八旗官學教習兩世俱以優行貢太學富曾兄弟四人伯兄壽曾候選知縣仲兄貴曾候選直隸州州判皆兩中副榜貢生季弟顯曾進士協理遼瀋道監察御史劉氏自文淇以治春秋左氏學名海內毓崧壽曾繼承其業三世並列傳國史儒林人以比東吳惠氏富曾

淵源家學弱冠與仲兄貴曾同補諸生光緒戊子復與季弟顯曾同舉於鄉顯曾旋成進士而富曾屢應禮部試未售晚乃以國史館謄錄議敘得知縣棄弗就富曾少隨父兄讀書金陵肄業鍾山惜陰兩書院爲李大理聯琇薛觀察時雨孫學士瑯鳴所器賞丁父憂歸里初授徒於家繼乃友教四方成就弟子甚眾平生於治經外兼攻疇人術當嘉道閒羅徵君士琳以通西法成四元玉鑑演草一書垂數十年其學幾絕光緒初徐太學鳳誥私淑士琳而遙與金匱華蘅芳氏相應和時江淮閒風氣未開以習筭爲怪事富曾獨師友鳳誥與相切

劉人或非笑之不顧也爲文無師派而樸茂淵懿自爲經生家言館南陵徐氏漢陽洪氏最久改國後游海上爲吳興劉京卿承幹校讎羣籍劉故富會年家子擁巨貲而好風雅刊刻古書甚多尤禮下賢士富會主其家十年所校書以宋會要爲最致力是書湮已久大興徐氏松從永樂大典中鈔出卷帙浩繁京卿購得藁本擬爲刊行乞富會審訂富會於卷數增減門目分合事實隸屬一一鉤稽而整比之復爲是正其訛誤釐然秩然殺青甫竟而富會年近八十歸老里門矣富會性孝友事後母黃甚謹伯兄蚤世仲兄亦前卒禮敬寡嫂撫遺孤有恩伯兄子師蒼登賢書又不幸無祿遺孤二復撫之成立與季弟相愛白首怡怡一門以內可爲士大夫法持躬謹飭自少至老不挂於過差性廉介非義不取接人常持謙下未嘗有急言遽色尤喜引掖後進不以年輩自居以故人樂親之年八十有二以戊辰十月卒所著遺藁若干卷尙待寫定付梓無子以季弟顯曾次子師穎爲後

顯曾字誠甫富會季弟也少隨父兄讀書金陵弱冠補諸生時伯兄壽曾主金陵官書局顯曾則肄業惜陰書院院長薛觀察時雨名宿也器顯曾多所獎藉壽曾卒

顯曾代主官書局事光緒戊子與叔兄富會同舉於鄉
壬辰成進士以主事籤分吏部補考功司主事荐升員
外郎郎中加四品銜轉甘肅道監察御史協理遼瀋道
俸滿截取以知府用顯會通籍後居京師垂二十年庚
子聯軍之役兩宮西狩大臣以下相率奔竄自臺省迄
部寺幾於一空顯會時官吏部兼總理各國事務衙門
章京或勸其蹙避顯會以食祿忠事持不可未幾京師
陷仍日趨直如故時各國駐軍張甚遇我國官員輒呵
問故加陵侮顯會以理折之不爲屈光宣之際朝局日
非顯會居臺諫前後七上封事皆關天下大計方貴倖

卷八

人物傳

十二

用事於言官所陳多遏抑惟最後論賦稅徵解銀兩不
便一疏奉旨交度支部議奏餘皆留中是以顯會所言
雖切外莫能知也庚戌丁後母黃憂歸明年國變自此
遯跡秦州以王伯厚元遺山自矢居秦十餘年歲乙丑
復返故里時叔兄富會猶健在兩老人偶作近遊策杖
偕出偃僂道中衣冠古樸貌恭而色溫君子之儒可望
而知也顯會書法北朝嗜金石所藏碑版甚夥著有詩
文集若干卷尙待梓前富會七月以戊辰三月卒年七
十有八子二人師慎民政部七品警官蚤卒師穎爲叔
兄富會後

于長慶字笛生世居東鄉塘頭祖暹春父振騏並見前志長慶兄弟四人於次居仲幼隨父兄讀書劬於學恂恂無子弟過年二十以縣試第一補諸生翌年夏文襄同善督學江蘇按試揚州長慶觀風經古俱名列合屬第一遂食廩餼其後凡七應歲科試五冠其曹調江陰南菁書院肄業光緒辛卯擬取優行貢生旋中是科鄉舉四應禮部試未售戊戌公車入都適會朝局之變黨禍起而外患日迫長慶睹時勢知不可爲而堂上春秋高伯兄齊慶官翰林不能歸乃絕意進取里居閉門奉親外則唯以課耕著書爲事自此足不履城市凡三十

年方長慶肄業南菁書院時獲良師友之益通羣經而於許氏學尤有心得嘗手錄諸家注分別異同都爲若干卷近海上丁福保氏所刊說文詁林亦同此例其書視長慶爲宏富福保居都市懸重金以徵集羣書而或司繕寫或任校讎其事易長慶篝鐙秉筆窮數十年之力長編甫具而出自一手其事難也別有杞盦脞錄若干卷皆平生閱世與觀我所得隨手輒記者于氏爲江都故家相承詩禮長慶兄弟輩多貴顯而獨甘以隱遯終所居塘頭位江都之極東近古海陵長慶藹然儒者貌恭而色溫與人言呐呐如不出諸口而誠意所感鄉

人化之雀鼠之爭往往得一言而息自奉儉約恒刻於已而戚族里黨閒緩急多倚之滄桑而後古風蕩然獨此一方猶有存者人比之鄭公之鄉焉以己巳五月卒年七十有三子二寶麟寶甲並賢孝寶甲先長慶卒士論惜之

陳懋森編纂

卷八

人物傳

十四